



partii naleraq

UKA2015/72
19-11-2015

**Apeqquteqaat aallaavigalugu oqallinnissamik siunnersuut: Qanoq ililluta ilagiit
sinniisoqarneq nakussassarsinnaavarput? aamma qanoq ililluta
soqutigineqarnerulersissinnaavarput?**

(Inatsisartunut Ilaasortaq: Anthon Frederiksen, Partii Naleraq)

Inatsisartunut ilaasortaq Anthon Frederiksen apeqquteqaat aallaavigalugu tassalu qanoq ililluta ilagiit sinniisoqarneq nakussassarsinnaavarput tamannalu Partii Naleqqamiit oqaaseqarfigissavarput.

Inuunermi timikkut tarnikkut anersaakkullu nukittuujunissaq pingaartoorujussuusoq Partii Naleqqamiit oqaatigerusupparput. Upperneq neriunneq asanninnerlu taakkuninngagooq tamanik asanninneq anneruvoq taamaattumik tullimut asanninneq siaruaternerusariaqarparput.

Ilageeqarnikkut sullissineq sullissinermilu atugassarititaasut pitsaasunissaat tamatta pingaartittariaqaripput oqaatigissavarput. Tassami ukiuni makkunani ilageeqarnermi sulissusinermi ilaatigut oqaluffiit palasit illui aserfallakkiartuinnartut isiginiarnerusariaqalerpagut.

Ilagiit sinniisaassa sulinerat qiviassagaanni malunnartumik annerpaamik ingerlatsisut tassaammata utoqqanngulersut utoqqaallu, qujanartumillu aamma inuusunnerusunik ilaqartarmata nuannerpoq neriutigaarpullu inuusuttut ilagiit sinniisaanni peqataasut suli amerliartorumaartut.

Ilumoorpoq oqallissaarisup eqqaasai tassalu ilagiit sinniisaannut ilaasortat sulinerminni ajunngitsorsiaat qinikkanut allanut naleqqiullugu pitsaanerpaajunngitsut. Taamaattumik ilagiit sinniisaanut qinikkat nuannaarlutik suliassaminnik anguniakkaminnillu ingerlatsissappata qinikkatut allatulli periarfissaqartinneqartariaqartut Partii Naleqqamiit isumaqarluinnarpugut.

Nunatsinni ilageeqarnikkut atukkat eqqarsaatigalugit nunaqarfinni malunnartumik nukittorsagassapput, ajoqissaqarniarnikkut pattattoqarniarnikkut aamma ilagiit sinnisaat amigartartut naammattoorneqartalerput, tassunalu takusinnaavarput ilageeqarnikkut nukittorsaanissat aamma nunaqarfinni annertusartariaqartut aamma illoqarfiit ilaanni.

Nunaqarfinnut palasit angalasarnerat siornatigut akulikkinerugaluartut massakut malunnartumik akuttutsinnikuupput taamaalilluni aamma palasit amigaataanerit tassuuna malunniukkiartortoq oqaatigineqarsinnaavoq tassami nunaqarfinnut palasit angalasarnerat malunnarunnaariartomat.

Illoqarfinni arlalinni palasit amigaataapput, sulilu immaqa amigaataanerit annertusiartussalluni, ilaatigut palasit utoqqanngulersut aamma suliunnaartartut eqqarsaatigalugit, illoqarfinni palasit

kisimiillutik atorfeqartut illoqarfinni angisuuni palasiusut assut ulapittarsimassasut takoorloorsinnaavarput, tassami palasit kisimiittut ulapittarsimassaqsut ilimanarluinnarmat tassami naalagiartitsinerimmi kisimik suliassaangitsut nalunnginatsigit.

Palasit illoqarfinni amigaataagaluartut sooruna palasit ilinniareersimagaluartut palasinngorsinnaagaluartut qinnuteqartaraluartut palasinngortinneqarneq ajortut, tassami ilinniartitaanikkut piumasat pingaarnersaraat ilinniarsimasut nunatsinni inuiaqatigiinnut kivitseqataallutik sulissasut. Ilinniartitaaneramma akilersorneqarnikuvoq inuiaqatigiinni, ilinniarsimasuutigullu soorlu palasit atorfinissinnaangippata susoqartoruna? Neriutigaarput tassani massakkut ersarissumik akineqassalluta.

Illoqarfinni nunaqarfinnilu ilagiit sinniisaat assersuutigalugu Palasissaaleqinerup qaangerniarnerani qanoq sunniuteqarsinnaappat? Palasinik atorfinititsiniarnermi sooq sunniuteqarnerusinnaangillat tassami upperisarsiornikkut ilagiit sinniisaat sumiffinni aamma sunniuteqarsinnaaner at annerusariaqaraluartoq takorlooratsigu.

Ilumoorssinnaangilarmi ilagiit sinniisaat sumiffinni annerusumik sunniuteqarsinnaangippata palasissarsiornermi tamannalu pissusissamisuumngitsutut isigaarput. Nalunngilarput tusartarlugulu taakkugooq uunga illoqarfimmut qinnuteqarput kisiannili tiguneqassanatik naak nalunngikkaluarlugu Palasit sumiiffiit ilaanni amigaatigineqartut.

Ilagiit suliniarfigineqarneranni ilagiit nukittuumik inissisimassappata taava sulisussat upperisarsiornikkut inuttullu tarnikkut nukittorsaaffigineqarnissaat ingerlalluassappat innuttaaqatasullu eqqarsaatigalugit ilagiinni sulisinnaasut tamarmik atorneqalertariaqarput aammalu ilagiit sinniisaasa suliniarnermikkut annertunerpaamik sunniuteqarsinnaaner at anguneqartariaqarpoq.

Ajoqit atugaat kiisalu pattattoqarnikkut nunaqarfinni illoqarfinnilu atugassaritinneqartut oqitsuinnaangitsullu oqaatigineqartarput pingaartumik pattattut eqqarsaatigalugit.

Aamma oqaatigineqartarpoq ajoqit pattattuujutigisut aningasarsiamikkut pitsaavallaangitsumik atugassaqartitaasut, taamatullu aamma illoqarfinni pattattuusut amigaataajartuinnartut eqqarsaatigalugit tamannalu eqqarsaatigisariaqakkatta ilagaat, kisianni nalunngilarput maani aningaasarsianik aalajangersaasinnaanata taamaakkaluartoq eqqarsaatissatut apuukkusuppagut.

Neriuppugut siunissami ilageeqarnikkut suliniarneq nukittoq pilersinneqassasoq, aammalu palasit amigaataaner at eqqarsaatigalugu pitsaanerulissasut palasillu amigaatigineqartut illoqarfinni amigaateqarfiusuni innuttalerneqarnissaat tamakkiisuumik kammattuutigaarput.

Hans Enoksen